

千頃齋初集

千頃齋初集卷之十九

汝南黃居正明正父著

文部

啓

迎溫少司成公

太學賢士關首善萬國

高皇豐鎬地並建兩

都特簡儒臣往司教父師垣上座推詞章翰

墨之宗士類具瞻爲詩書禮樂之主載光新

命式重舊圖恭惟老先生閣下學統聖真道先

民覺吐則經作則典 天語之煌煌非乎默成
象語成爻風標之皜皜尚矣蓋自南宮顓俊以
迨東觀橫經志存浴日補天遠接夔龍之步武
文能起衰濟溺冥探洙泗之淵源 帝曰禁地
深嚴非斯人不可 朝謂人倫模楷舍夫子其
誰暫輟侍從之班俾貳成均之席招諸生立館
下先示勤思披六籍問箇中首明忠孝五百年
而得韓愈共仰斗山七十子之肖仲尼並依日
月木從繩則直允矣吾道之棟隆水障瀾以東

洵作斯文之砥柱從此園橋桃李歌棧樸於園
京竚看曳履星辰調鹽梅於商鼎某等章縫末
品襍線微材竊食鵠林屢蒙嘲於邊笥皈身虎
幄願受鑄於孔模側聞除音歡騰舞手風雲月
露之習今一變乎蟋蟀鹿鳴之章行卽陳之雖
昏棗散樗自揣不儀不范惟春風化雨敢忘亦
步亦趨況茲濟濟奉璋日望循循善誘卽祈脂
轄下臨翻藥之堦有喜彈冠恭致育莪之頌削
牘倍深雀竹負弩聊託鴻飛仗冀慈涵曷勝翹

歧

與吳司李薦馬巽父

萬里負風快覩鵬搏天上五茸聽棘遙瞻鳳集
雲間猥以舊游獲聞新政寬猛同符東里剛柔
合軌仲山榮被通家歡騰闔郡恭惟臺下學深
鴻秘才迅龍淵匡廬彭蠡之靈奇玉璫黃流之
馥郁宜燃藜於秘閣天將藉以藻黻 王猷暫
司李于松江 帝且畀之練習民事心鑑月朗
燭羣吏以冰壺肺石宵空返澆風爲醇樸九峯

三泖咸頌羔羊四聽五難頓希鼠雀方歌襦於
澤國行補袞于巖廊某下士採芹朽資集木幸
徼伯氏得識荊州白下侍聲欵倏忽已逾十載
長安通名刺倉黃未接一談欲往從之河無梁
誰謂水淺亦旣覲止心則悅祇有葵傾茲因弟
子之言旋敢問世兄之啓處不揣愚賤妄思引
推幸遇林宗豈牛醫而見鄙旣逢伯樂量馬羣
之必空三都之賦已成敢爲玄晏洛陽之才可
薦是在吳公誠悲原憲之貧輒上禰衡之表伏

望文明造士豈第作人再施旣止之風雲用發
後來之桃李敬陳尺幅薄貢寸忱豈謂溪澗沼
沚之毛可將明信所賴驪黃牝牡之外另有達
觀

與施漕使

出綈宸旒督漕天塹歌皇皇隰華仍鎮咽喉
之舊際萋萋春卉載觀戟纛之新六轡如絲三
軍挾纘恭惟臺下望隆山斗器比琳球司李于
姑孰之墟風生露湛握蘭在司空之署玉潤冰

清乃鳩屏功奏平成於河瀆遂持憲節藉保障
于淮揚敷土方殷遇玄夷授書金簡蜚芻正亟
戒黃帽效命艤艤輪塞北之軍儲懌天子疆
場之慮寬大東之民力固國家根本之圖言
人人殊具云蘇天之覆露賦上上錯全歸禹貢
之山川勞鴻雁於澤中計安百堵集夔龍於沼
上卽近三台某再鼓已衰一瓊獨冷幸茲南國
咫尺龍光憶昔瓜洲追隨塵尾念壘篴之雅臭
篤如蘭拜璫玖之頒榮施行李亦旣觀止心則

悅矯然霞飛欲往從之河無梁疇謂江泳貧女
布席願分鄰燭之輝野人獻芹猶媿錯刀之報
敬陳尺素聊抒寸丹

賀竇右轄

伏審 中詔起家南閩作翰民懷遺愛昔分陝
於三邦 帝睠舊臣茲正位于二伯四履式歌
且舞萬聲匪約而同恭惟臺下岳峙孤標壁立
萬仞階自爲郎爲牧駿矣方岳之高華政則宜
民宜人居然畏壘之尸祝熊車徵異臬山麥秀

兩岐臯比題材湘水蘭滋九畹勵冰清以帥屬
吏凜秋霜拔薤本而鋤奸人游化日急流勇退
雖乞芰荷以爲棠居富去思咸跂鱗魴而歸袞
七閩非它鎮比采阻海陬九重以我公行用
壯南紀彼父老謾爭于境上吾兒童已待于關
門棠舍陰濃未改江山之舊薇垣地峻載觀雨
露之新甘膏隨春腳以同來孽羽望炎光而散
去惟大東杼軸方憂繭絲況屬國攬撿宜徹桑
土樽俎折衝乎千里端藉蕃宣文武爲憲於萬

邦竚瞻牙纛某等夙依夏覆如陟春臺懷明德
以弗諼聽除音而有忭幸父母孔邇非敢披綸
同子弟歡迎恭先勸駕雖暫屈雲霄之雋武猶
鬱具瞻然可俾瀚海之安瀾願言終惠頌猷所
注哇俚曷宣

賀劉廷尉

代

伏審疏渥 楓宸晉卿棘寺好生如舜方惟刑
之恤哉選衆舉臯則不仁者遠矣此六幕共瞻
山斗矧一陶出自鑪錘恭惟閣下直道如絃貞

心韞璞爲邑政成三異菱兩地棠題材鑑徹九
方樹百僚楷其間南北行藏之迹關世運之重
輕總之光明粹白之操與前人相頡頏旋貳京
兆之尹時殿天子之邦方千里曰王畿平分
風月統十連於大府咸仰歲星嗟士女仳離聚
其泣矣賴君侯衽席安且燠兮爲中澤之鴈鴻
而請命口與天爭驅憑城之狐鼠以潛踪法
自近始帝念饑饉扎瘥之後折民惟刑人思
慈惠明誓之師命汝作士子雅之竭誠奉國

古之遺與長升之正色立朝今再見矣平三尺
之憲暫詳讞於丹書活千人者封行峻登于玉
鉉某誤收門李媿落社樗奉馬帷提誨之餘敢
忘宗岱叨虎觀談經之任倍切飲永久矣不託
於音帳宮牆之日遠時乎忽聞出綍欣屋厦之
可依竊彈貢冠竚聽鄭履旱作霖川作楫知不
負象形之求泥在範金在銘願永託生成之造
其爲頌猷曷旣鋪棻

與南安史明府

題千佛之名聽臚傳於

楓陛寄百里之命拜

除目于花封行馳三異之賢聲已動一同之喜
色遙瞻鳬舄虔致魚書恭惟老父母臺下遂字
淵泓峻標嶽峙圖南搏六月之息人在下風冀
北空萬馬之羣誰當上駟宜燃藜於祿閣乃剖
竹于江城煉石神工小試初煩製錦發硎利刃
長材故藉盤根瞻茲武榮實泉下邑 帝念山
陬海澨之國妙簡宅生公以慈惠明察之師榮
膺司牧暫屈牛刀之奏播此絃歌用爲鴻漸之

階遷于銓省某等備員冷局幸依咫尺之天繫
籍編民正屬帡幪之地耳神君之至止彌深孔
邇之懷同衆父以皈依更興樂只之頌雲霓引
領恭先騎竹之黃童霖雨隨車願憫杖鳩之皓
叟匏繫莫趨燕厦葵傾敬介厓臣用代執爰有
懷歛板

復史南安

造士園橋媿乏三春之雨愛人君子寵貽五朶
之雲鼎獎逾涯豐儀蕃錫感情文之多溢矢銘

佩以弗諼恭惟臺下瑞世鳳麟承家奎壁奮南
溟之翮人在下風空北冀之羣誰當上駟暫屈
九霄之步坐提萬井之封德意惟注于左右民
功令適符於先後甲福星臨蔀屋野多來暮之
謠膏雨滿稻梁境有熙春之樂治績茂騰於三
異歡聲遍叶于一同小試牛刀已批郤而道窾
高飛鳬舄卽補袞而嬰鱗某拙士采芹朽資集
木學窮五技所患好爲人師籍授一廛樂只民
之父母每勤仰斗未遂登龍樂且有儀思嗣袞

章之頌施者未厭重辱瓊玖之頒拜手增慚徒
據寒氊而悚仄拊心欲結更依厦屋爲旃幪啣
在中丹陳茲副墨

復謝比部

擁三鱣之丈席未改鶚林勤蠶鯉之尺書聿來
芹水跋龍光而睽後辱瓊玖之施先恭惟門下
介氣秋高逸情雲上藹咎繇之淑問名震西清
抗劉向之直言力砥中柱宜登庸於槐棘胡養
晦於林丘三千界浮烟太虛何損廿四橋夜月

清照逾多益徵余佩之芳竚見 帝環之賜某
蛩蛩末品鹿鹿豎儒久塵僦直之班復忝造髦
之任強扶蹙病恐難乘駕鶴之軒空誚腹便願
亟返屠羊之肆苟完試事業有控陳乃荷豐函
俯垂晉錫遐不謂矣寵榮一字之褒何以報之
媿乏七襄之杼心旌所注舌筆難宣

餞劉奉常

伏審劍履趨 朝驂駢載路 國懸夷夔之望
顯奏膚功 廷質禮樂之成茂騰歲閏協神人

和上下豈玉帛云乎哉統百官諧萬民則俎豆
聞之矣期月可也矧底績於三年自天申之
行登延于八座某等幸依屢覆倍切巖瞻仰卿
月之輝一星且朝北斗聽商霖之賚三事卽
秉大鈞願執爰以前驅敬齋宿而勸駕雖溪毛
澗芷無足羞王公而敝履舊簪或不遺君子恭
陳祖帳敢告中涓

同羅玄父張克雋請李本寧先生

葵傾北斗願挹龍光藻采南雍幸交驥子介紹

而通孔禰跼蹐無堵齋宿以因時陳瞻依有自
令節矧逢至後 皇都更得春先敬秩初筵預
開別館青牛紫氣忻迎柱下於絳霄玄酒太音
共聽郢中之白雪竚候鸞和豈勝鵠峙

中秋復柯關使

三秋甫半五夜正中人月霽清不淺南樓之興
江天一色遙分東壁之光惟臺下篤念維桑無
忌采菲芝翰鼎來四六筐儀賁錫再三一水盈
盈恨未共冰壺之賞霽珠炯炯顧何當玉案之

酬拜以爲榮服之無斁隨粉榆里社同酌金莖
媿苜蓿寒齋莫報璫玖追惟彥會幸托嚶鳴儻
念書淫願矜夙諾謝謝

冬至復柯民部

天復一陽初長化日星連五緯有曜使躔對令
節以凝禧念寒氊而播煖恭惟臺下心清若水
政燠如春聚人曰財坐幹流泉之運噓物以氣
潛回黍谷之溫賁然郇翰之五雲榮于從事之
十部某才無一線念已百灰炙背負暄幸受萬

問之廣芑考祥視履但占七日之朋來拜手慚
乏報瓊拊心感逾挾纊恭陳俚頌伏冀鈞涵

與吳納言

代

坐擁鱣堂方兢集木功虧蛾術復虞採薪惟力
小而任鉅故災生于福過幸依山斗敢乞溟波
恭惟臺下爲國寶臣得天瑞氣補日月山龍之
袞洵直且侯勵冰蘂羔羊之操甚德而度行行
且止避御史霜凜埋輪皇皇者華遣使臣風清
攬轡爰自法星之耀峻登卿月之華典庖署而

總領從官名齊孟杜司封匭而出納 朕命武
接夔龍於我如浮雲公何心于陟顯用汝作霖
雨帝且咨曰宅揆暫通喉舌于銀臺卽進腹心
乎玉鉉某器能淺薄人地單寒弭金華之筆慚
鳳掖之久塵橫壁水之經媿鵷林之未改蒲柳
羸弱況未秋而先衰我馬隤虺卽十駕其鉤補
強扶蹇病終難據講席之臯空負腹便可再玷
乘軒之鶴控陳屢格跼蹐滋深謹瀝誠於大鈞
俾有造於小子枕流漱石幸全草野之餘生濡

涸噓枯莫名乾坤之大德其爲啣戴未究傾抒

復黎叅戎定婚

將門出將幸依粉梓之鄉儒子爲儒敢意松蘿
之附入林方欣投漆締姻忽冒采葑信作緣之
自天故好合於茲地恭惟麾下河山華胄文武
名家壘簞趾接于青霄鷹揚入穀設畧秘授于
黃石虎旅聯鑣粵左登壇海宴扶桑之窟淮陽
建節塵清細柳之營特蒙 睿簡首參陪樞鈴
閣霜飛用壯兩都之鎮介士雲集仍屯七校之

師留京益輦于金湯北門倍增其鎖鑰謀禮樂
詩書之帥疇領元戎得彪虎熊羆之臣惟師尚
父天胙明德宜爾孫子之多代有令人必復公
侯之始豈謂玉樹肯倚蒹葭辱傳命於蹇修來
充庭之筐篚占符叶鳳其如苜蓿之淡交喜獲
乘龍願振縑緗之素業敬偃僂而登謝用齋沐
以致詞薄有報瓊仰祈鑒菲

代周叅軍回伍氏贅婿

對月探書赤繩預繫夫婦搗霜得杵藍橋遂會

神仙期及三星好合二姓色增門闌之喜禮成
監宅之歡恭惟 門下忠孝傳家冠紳奕世安
海才多陸海代有科名後山光映前山夙符喬
夢花封桃李潘君之縣譜猶存樹砌芝蘭謝氏
之書香不替封胡羯末宜諸少之並佳瑜珥瑤
環惟伯兄之則友某猥承祖德媿忝門風辱尊
人俯念卑微使下走幸攀閭閥況令弟崔龍幼
擅類三復之南容柰弱息姜鯉粗嫻非五長之
衛女何意東床之坦適諧舉案之恭信作緣之

自天故共牢於茲地某一官獨冷漫爾棲身貳
室初開榮哉得媚清冰慚樂令惟欣叶鳳之占
明珠遇玠郎不負乘龍之託必河之魴必河之
鯉尚祈采藻以采蘋言秣其馬言秣其駒更待
刈萋而刈楚光遠有耀鼓忭無涯

爲季弟娶會

仲春會男女禮順天時之子宜室家詩揚風化
好旣合於二姓宿復會夫三星宜效鳳飛以諧
燕婉惟執事之食封梓里禮義不訾矧淑姬之

毓秀閨房德容洵備方卜東床之坦遂聯同里
之昏向月探書知赤繩之久繫種田得璧忻玉
杵之再逢標梅其實七兮已求士而迨吉唐棣
何彼穠矣正歸妻之及春謹請慈闈爰醮季子
迓之百兩御以三周雜佩含風競新粧於桃李
香輪耀月映瑞色於雲霞允矣鳩洲之好逮其
柰雀屏之虧選自惟洛倩有忝齊姜然而鴈序
焉依賡壘簏于旣翕龍門有託嗣冰玉以無慙
儻就鞭箠可希駿于駕質庶和琴瑟或弋鴈于

二上
雞鳴則裘褐相將日舉梁鴻之案而蘋蘩獲主
不負姜鯉之門矣敬布蕪詞伏垂慈鑒

代黃贅周

月老探書豫定赤繩之夫婦雲英擣藥遂諧玉
杵之神仙恭惟臺下再世科名三朝舊德夙栽
美錦開河陽一縣之花晚遂初衣種彭澤五株
之柳丹砂傳自勾漏駐爾朱顏紫誥頒來禁闈
榮茲黃髮惟篤生乎賢喆遂濟美於簪裾夕拜
蜚瑣闥之聲春暉映薇垣之署周郎年少昔幸

托於醉醪齊耦門高今何緣而倚玉自慚鄭忽
獲連閨閱之婚何物黃童敢望金張之館然而
贅婿有嘉命權倣秦風仲春順天時猶存周禮
謹醮季子作倩名家就貳室於唐甥接芳隣于
孟氏謝庭玉樹時多蘭芬樂令清冰日瞻芝宇
錦屏綉褥豈戀監宅之歡娛椎髻布衣祈舉灑
陵之操作庶觀星睂旦而燕爾無耽將望氣鬱
葱而龍乘有託青春蚤作蟾宮客勉繼前修好
音先慰鳳樓人方成快婿

代黃娶丁

化先閨闈美桃天之宜室春會男女迨冰泮以
歸妻恭惟執事才霸文江門稱學海謝庭玉樹
承家皆遇末封胡王氏青箱傳世有箕裘弓冶
夢松瑞符丁固挿架志希鄴侯何臭味之偶同
乃松蘿之得託猶子某質元驚乘教乏鯉趨幼
作蠟鳳之嬉猶慙許可長聞刻鵠之誠未改議
譏顧非三復之南容獲配五長之衛女牽絲繡
幕忽鉤射雀之奇得璧藍田幸沐乘龍之寵雲

郎方少星夕及時蟾桂近姮娥欣諧燕爾鳳樓
下秦女願效鸞飛庶嗣裘褐之風永堅瑟琴之
好相無奇表敢云世德宜賓高門性似我家豈
其福人不在貴族謹肅賓而醮子爰薦幣以陳
詞

代陳繼娶洪

昏始人倫盟締舊雅惟喬宗共里世作舅甥況
桂籍附升代稱兄弟翳吾家之小謝廁末交於
仲容少忝唐科幸陪登駿今叨洛倩喜託乘龍

豈曰人謀獲遂蹇修之請洵也天作預符敬仲
之占溷燕侶于鶯儔自慙非耦續麟膠于鳳嘴
必調徽音作嬪夫君儻母忘鴈弋之警提攜兒
女庶永篤鳩桑之慈

代答王納采

同里締姻敦夙緣於世契儷皮作禮申嘉貺于
成言願門閥之云微恃臭味之未遠齊姜維耦
洛倩允宜恭惟門下氣接鴻濛文成豹變籍通
四世後先濟美於鰲峯才霸七閩姓字高題于

鴈塔行乘六月之息奮鵬翮於莊溟卽聽三春
之雷登龍門于禹浪風流江左紛諸少其並佳
月旦汝南信王郎之不惡胡東床卜坦弗棄我
孟姬乃後幕牽絲獲昏爾家督豈惠徼前人之
好故敦重伯氏之盟諏吉元龜命馳將於一介
陳誠采鴈寵驚溢於百朋某喜飛鳳之叶占幸
乘龍之有託謹肅賓而廟受用什襲以珍藏薄
效報瓊仰祈采菲

上黃學士老師

參苓滿篋願備藥籠沆瀣一家幸收材館九十
人之解額慙負芝英六一公之品題濫叨玉笋
大造真同于幃載微材莫效其涓溪恭惟老師
閣下光岳元精乾坤間氣胸包學海汪洋注萬
頃之波德聳瞻巖巖嶽竦立千尋之壁鴻裁潤色
西清蚤會於風雲虎帷論思北斗常依乎日月
望推民譽忠簡 帝心頃厭金華侍從之勞欲
就綠野逍遙之適乞休沐之五日榮被 恩俞
賜公假之三旬勉從輿請溫公歸洛土卜天下

之安危謝傳臥東山爲蒼生而立起行奉一封
之傳入隨三節之趨爰立之卜叶人情惟肖之
夢應帝賚蓋出處關乎世道而行藏鑑于古人
丘壑獲遂于初衣中外每懸于歸袞矧在玄亭
之列久虛絳帳之陪負笈有懷登堂是望伏念
某社樗櫟槁膏棗鈍昏志竊慕於雕蟲技不成
于刻鵠始以濫吹之曲誤點朱衣終緣蟠朽之
容受知青眼賜顏色於塵柄借齒牙於鈴齋曲
矜蹇蹇之愚過損循循之誘榮袞章一字靡遺

五管之微享敝帚千金有過衆人之遇培甚微
之乎甲冀其長茂而成材吹至弱之鴻毛欲使
翩翻而戾漢柰瑟鼓而竿好亦能薄而數奇實
求齊之未工遂暗投而相盼傷弓之羽已怯於
虛弦獻璞之趾又愁于再刖賞音難必殊負簞
揚之心顧影自憐動遭跋躓之咎然而得不得
曰有命偶遺英雄之轂中樂莫樂兮相知喜出
大賢之門下壯心未已視舌猶存敢不淬礪潛
修勉承德意泛桃花之新浪尚認前津指楊葉

之舊穿妄圖後矢謹綴窮愁之簡突奏蕪累之音竊覘崇閎將塵隱几豈曰寶石爲玉弄巧於班倕之門實欲點鐵成金陶鑄於洪鑪之冶幸降音旨少貶光塵不愛鞭弭之私俾獲題評之目庶策駑希驥蹇足可致千里之行磨鈍爲鋸鉛刀或效一割之用酬恩何地徒勤肺肝感德終天欲摩頂踵敢陳竹牘恭叩槐階翹仰啣鱣之庭可勝罷馬之戀

上馬直指

代

按圖索駿謬叨校藝之司授簡雕龍再辱代言之委感知特異揣分奚堪恭惟臺下霖雨濟時風霜肅物衡持國是望久重於三台繩糾臺綱化大行於兩浙斗山共仰推儒學之正宗水鏡無私負人倫之朗鑑間從察官之暇復有掄士之評顧枯朽奚藉以先容乃菲葑不遺乎下體寵溢琳瑯之重榮踰華袞之褒伏念某樗櫟散材簿書小吏學未成於製錦正慙紛紛絲斲幾誤於揮斤尤慚血指筆則筆削則削贊一辭而無

能步亦步趨亦趨驚絕塵之逾後且羔而飾豹
羊質可溷虎皮況狗以續貂鵠刻終爲鷺類俯
窮鼯技仰乞鴻裁豈敝帚敢期乎千金庶鉛刀
或效其一割寶石爲玉殊詒周客之嗤點鐵成
鏐實藉大鑪之冶

奉楊學史

道仰關西幸出一陶之冶文宗斗北遙瞻數仞
之牆矢以勿諼去而益詠恭惟老師閣下 國
之元氣學者泰山逢聖人如日之中陰霾屏息

見御史從天而下峯嶽動搖特簡譚臣往司
教父體觀象之風行地若大有之火麗天自是
秋陽暴之素絲之皜皜尚矣有如時雨化者奉
璋之戔戔非乎障狂瀾必東卓爾爲時砥柱繩
曲木以直胡然與世鑿枘公乞芟荷以爲裳彌
芳余佩衆望鱗魴而歸袞竚錫帝環且朝局
翻如舉棋而國是紛於築舍東山卽忘乎捉鼻
其柰蒼生傳巖已肖乎象形詎淹綠野某少始
知學亦有立功立言之思壯不如人勉就爲貧

爲養之仕窮年膏火燈無太喜之花卒歲種寒
袍已半枯之葉幸託鴻鈞之一氣獲庇燕厦之
萬間韻爨下之焦桐叶乎宮徵文溝中之斷木
飾以銀黃鵠過都而退飛慚非健翮鳩控地而
決起喜有培風吾道南乎懷思天地之高厚江
之泳矣蹉跎日月之居諸況損煥乎之章曲垂
循然之誘國士遇我報以國士未足酬三大之
洪恩故人知君君知故人渠敢溷四知之清德
何其久也必有以也所蠲積罪於丘山中心藏

之何日忘之永踐初盟于河水祇候純嘏用布
下悰

兒龍娶張迎書

族號金張素符地望春會男女復順天時期已
及於三星好宜合於二姓禮行奠鴈述洽洲鳩
恭惟門下簪紱承家星屏夙徵於展驥弓箕嗣
美風翮竚需于搏鵬舊守之世澤如新知公侯
之必復太史之科名特盛況諸少之並佳計壺
德妙稟師箴已無慚于彤管而兒才粗諳洛誦

妄有志於青緇惟是葑菲之不遺所以絲羅之
得附顧淑女標梅已實久懷父母之心柰弱子
苜蓿焉依未遂室家之願迨茲冰泮穠矣棣華
言秣其馬言秣其駒今已束薪而束楚必河之
魴必河之鯉更期采藻以采蘋敢告廟而肅賓
用醺子而逆婦迓之百兩御以三周勸郎勤六
經尚觀星于昧旦卜妻占八世或望氣于鬱蔥
行聽鳳鳴可勝燕喜

與徐選部

集鶚翩於泮林敢云鱸堂之獨冷轉鴻鈞之一
氣若爲蟠木之先容誤蒙特達之知彌篤孤生
之感竊以留都首善地鎬豐敎並上庠大學賢
士關櫟棧化先南國自非極羣儒之選曷足參
二監之聯規姚姒逮莊騷猶聞弟子之笑出義
皇過屈宋難免經術之疎如某者質窳無奇學
落不殖蹉跎壯歲迫爲稻粱之謀磊砢雄心未
除湖海之氣塞馬俛得而俛失鼯鼠五技而五
窮蓋亦拙於逢年豈獨慳於造化濫竽海校已

塵掌故之科竊吹陪雍更乏知新之益徒慕寒
芹之可食患在好爲其如堅木之難攻無以待
問偶承人乏遂忝資升雖仍教胄之班終覺丞
予之負仰惟閣下鑑衡萬品柱石九埏用必
惟人細楠大桼之各得使無棄物牛溲馬渤之
並收如泥在型如金在鎔全歸一陶之冶以漢
之濯以陽之暴盡消萬斛之塵舉爾所知何妨
八百吏薦下輩士奚止十數人左右芼之且及
水中之荇清濁判矣寧遺爨餘之桐某固無鶚

炙之求公豈因蟻子之援似茲德選允屬異恩
拜官公室謝私門詎敢犯羊侯之戒遇非衆人
報國士誓永堅豫子之心苟渝初盟有如皎日

賀方中翁大拜

代

恭審渙號宸旒晉延英袞春卿疏寵同參玉
鉉之謀猶綸閣需賢獨覆金甌之名姓榮哉二
拜穆焉一詞仰惟相公閣下柱石承天斗山
命世龍墀奏賦西清蚤會於風雲虎幄橫經
北斗常依乎日月隆隆偉度卑泰岱而狹滄溟

燁燁大篇駕馬班而摧燕許蓋自育周京之莪
樸已預調商鼎之鹽梅一疏格君每軫納溝之
恥三物造士用臻象垤之成翕然爲學者所宗
久矣在 帝心之簡且以身之去就力諍國之
安危於我如浮雲公志雖堅于林臥用汝作霖
雨朝望實懸于袞歸十載棲遲一朝遇合當揆
路虛席之久正 皇家張網之時 詔起貳均
俾攬羣倫之鑒衡操鰭俊遂參六典之司若泰
卦初九爻茅茹盡拔凡周官三百屬甄叙惟明

懸枚卜以求形幾數年於此矣宣制麻而
置弼得一賢乃兼之舜舉臯而遠不仁共推民
譽尹暨湯而咸有德克享天心間兩社以升華
面三槐而論道惟百辟巖瞻之已素故九重
柄用之特殊某夙廁門牆索叨埏埴絳帷天遠
屏營湖海之踪白日飈馳寥闊興居之問忽聞
新渥倍切恒欣歌芑士之詩敢忘燕雀之賀夏
續得臣之頌惟賦蟋蟀之吟秋所願彈冠振衣
沐浴更新之化竚看爲楫作礪旋轉泰運之亨

候申相公代

黃扉贊化 九重注想于 垂衣綠野怡情四
方拭目于歸袞所幸門牆之切敢忘山斗之瞻
恭惟 相公閣下一德格 天 三朝遇 主
十四載中書之考安攘功高五百年名世之期
明良泰洽手調元鼎潛孚納牖之忠力轉 皇
輿莫測運斤之用休休雅量士夫固日飲其和
穆穆迓衡 朝廷亦陰受其福 官府合于一
體世運益以如春 帝錫便蕃猶謂宗功之未

救公孫膚碩惟憂寵祿之過盈循四序以韜功
身退而名益重朋三壽而介社年劭而德彌尊
齒望渭濱竚後車之共載情懸洛社祝司馬以
還朝某夙奉循循慚稱藹藹十年乃字久隔光
範之門三舍謬承幸依通德之里望泰岱而引
領每蒲伏丈人之峰向溟渤以分波願朝宗百
谷之主惟蘄玄纁蚤賁赤舄重來若廣成子當
黃屋之師崆峒可虛訪道如文潞公赴安車之
召軍國尤倚平章龐眉黃髮爭看地上之神仙

綠緌蒼珩再挹山中之宰相寸衷欲結尺喙難
殫

賀韓璧哉兵使

奎文寓直三物化被羅施星傳有華四牡風清
閩越幸依宇下喜溢眉端恭惟 臺下學海汪
洋德園廣莫北斗泰山之雅望夙擅儒宗三朝
兩鎮之元勳猶存世閥起家版部弭節江關察
山澤之貨源風薰財阜寬舟車之民力遠至邇
安邦計用豐入襍望郎之被士衡 特簡出塞

膚使之帷歷井捫參且易椎雕爲冠帶披雲見
 日遂耀菁嶂于光明蓋惟道濟溺而文起衰敎
 尊師氏所以家詩書而戶禮樂俗革遠人萬里
 勞還十行改命維閩七聚泉興介其中權奉漢
 六條蕃宣靖此南紀徹桑綢牖伐狡謀日出之
 區出滯蘇罷憫大旱雨膏之仰樽俎折衝乎千
 里暫借油幢文武爲憲於萬邦行開戟府玄袞
 赤舄卽趨於王覲大纛高牙豈足爲公榮某
 舊識荊州已輕萬戶今叨邑子更授一廛惟欣

父母之孔邇敢避揚鱗願同子弟以歡迎恭先
賀燕千間廣厦幸免夜雨之相凌一寸寒荄尤
望春風之蚤到有懷慶忭莫旣輸陳

賀葉相公六年奏績進爵加恩

代

巽命元臣升班亞傅勲垂鼎鉉扶寶曆萬萬
之安位切魁台齊泰堦兩兩之色便蕃異數闔
懌同詞恭惟相公閣下有一格天半千應運
內修外攘身獨佩於安危嶽峙淵渟色不形乎
喜愠小心翼翼培主德于局嚴禁密之中雅

量休休鎮人情於波蕩絲紛之日譬調不調之
瑟誰知操手之殊艱如攻難攻之材自識匠心
之獨苦蓋當陰陽剝復之介默爲撥機卽在
宮庭金鬲之秋漸孚納牖火炎水潤鼎實之鹽
梅各調風震雨凌厦宇之棟隆自若效孤忠者
七載任重負海之六鼃撫庶績於五辰功高擎
天之一柱邊陲奏捷甫 頒上賞之書歲閏告
成載 錫宗公之胙進少保爲少傅貳三公而
彌 一人加地卿曰天卿統百官而均四海柄

璇樞於

紫殿冠鼎輔於黃扉

斧藻出綸蓼

蕭示惠勸賢能于十世業紹金張綿寵祿于二

黜秩視周召

上方葵忠以無已公乃孫碩而

不居雖

再命三命滋益恭欲回

成渙然

報德報功有常典難遂撝謙暫循階于左棘卽

正面于崑槐某等久囿大鈞遙瞻巖石有懷續

徂徠之頌爰託魚箋無地趨光範之門徒深燕

喜受命長矣第祿康矣錫公純嘏奚二十四考

之足云

元首明哉股肱良哉與

國同休亘

億千斯年而不朽寸衷欲舞尺喙莫宣

同鄉公賀韓觀察

簡記天降蕃宣地重黔中振木鐸之響化妙鑪
錘海上聞素絲之風聲先彈壓澄清二路怵舞
一詞恭惟臺下學深鴻秘才迅龍淵昔以版
部潛郎出領江關權政梯航萬里每聚吳粵之
珍勺水千金宜試夷齊之飲泉布常流於地商
旅願出其途帝問一歲錢穀幾何惟汝知財
源于取予僉曰多士楷槓在望其往通文教于

西南明

聖道如日之中幽遐畢曜見使者從

天而下原隰有光仰北斗宗泰山一變遂躋于
鄒魯尊六經黜百氏八表亦同乎車書瞻彼泉
興介茲山海旄頭永滅風帆陡發于三春戎心
匪茹桴鼓時鳴乎半夜屬以公私交瘠兼之水
旱不時天其畀驄馬繡衣之來望之若歲公如
聞魴魚赤尾之詠式遄其行拔薤撫嬰俾市虎
之無飛邑徹桑綢牖見海鯨之不揚波是爲閩
越之長城卽典璇樞之重寄某等獲依夏屋如

陟春臺願隨騎竹以歡迎竊幸熊轡之蒞止歧
龍門之伊邇猶阻鳬趨託魚素以陳誠恭伸燕
賀伏祈慈鑒曷任神馳

與楊世叔

日下班荆遂申僑札之分雲間把臂不覺針芥
之投精舍雪氍玄宮月榻促鄰而香銷燭跋披
襟則斗轉星移別後各天相思兩地舊歡不再
後會未期山川阻修千里徒勞寤寐鱗鴻寥廓
一水猶隔兼葭離緒轉深寸衷欲結台丈治行

冠乎三輔賢聲徹於九重甫奏民庸增秩司
馬卽趨王覲進署爽鳩獨持張尉之平竚見
千門之大弟久矣采藻猶然積薪青衫半荷葉
之枯綠髮已霜蓬之短聞新除而舞手託舊花
以彈冠跼齷轅下之駒敢希九方之一顧文飾
溝中之木或爲萬乘之先容倘念戀軒之情庶
免按劍之盼

與毛侍御

華亭鶴唳夙受一陶於鴻鈞阿閣鳳鳴更欽六

察於烏府冒貢小夫之牘仰干大化之鑪總恃
在鎔甄忘躍冶恭惟臺下貞心匪石直道如弦
明允持三尺之平春回黍谷丰采爲百僚之鑒
月照冰壺妙簡 楓宸峻登柏署蓋 上欲神
明其耳目惟公能左右乎腹心峩峩冠獬豸而
來 巖廊震竦行行避驄馬且止峰嶽動搖一
角觸邪貴權且肅然斂手數鱗批逆 天威亦
霽焉改容要 聖明無過舉之可書賴良臣有
嘉猷而必告以皇極之道平士論茅拔朋亡以

泰交之謨格 主心大來小往萬彙發舒而吐
氣羣陰退伏以潛踪轉日回天其在斯時矣爲
霖作楫豈異人任乎某勞以半生窮于五技鶚
林竊食未免便便之嘲燕厦慶成尚徼渠渠之
芑雖投閒置散固窮博士之分宜而起滯振幽
非明使者不及此儻憐簪履之舊忍靳埏埴之
恩階浮雲翼迅風是在齒牙之吹息援青松指
白水誓爲頂踵之捐摩苟渝初盟有如皎日

與沈太始

絳帳後塵共聽雲間之鶴唳 紫泥先奉爭看
漢表之鵬騫 渙號大廷晉司小選聞新除而
鼓枻託舊花以知歸恭惟臺下玉璫黃流之清
朱絃素絲之直貞心粹白昭昭揭日月而行亮
節孤高矯矯出風塵之外善斲而藏者十載慮
澹物輕發矻而試之一朝乃游理解急流中勇
退初衣欲遂平芟荷惟哲乃能官輿論公推于
衡石旋升右闥再陟左曹整風俗理人倫非崔
郎選事不辦斥華競塞私謁得王信銓司乃清

拔異登奇泰運有茹連之吉振幽疏滯賢路無
薪積之嗟暫作眉目於南宮追蹤裴馬卽司喉
舌於北斗接武夔龍某五技已窮一蘊獨冷望
英游履絕霄漢豈容鱗攀覬塵踪永隔雲泥未
緣燕賀惟是溝中之斷曾荷堂下之攜借上林
一枝之棲倘可依乎三匝託廣廈萬間之庇是
所望於二天計仁人踦履之不遺致士或從隗
始使下客彈冠而相慶酬恩請在豫先傾注采
勤染濡曷旣

再與韓兵使

賜履炎荒擁麾閩粵彤檐繡斧周原隰之咨諏
紫帽清源壯江山之彈壓星言雙節風聳百城
恭惟臺下學海淵洄德符粹盎樸望郎之被財
阜風薰褰膚使之帷鑒澄月朗道宗師氏仰北
斗以樞衣文格遠人對南金而斂衽蕃宣四國
特進方岳之階憲察六條更領兵戎之寄召康
公分陝之任望重保釐尹吉甫憲邦之猶才兼
文武塵清細柳四郊夜不吠厖海晏扶桑九譯

時來貢雉福星載道期月之惠問風馳霖露隨
車列屬之謳聲雷動某謬叨鱣席方依咫尺之
天幸託鴻鈞正屬鱸錘之地安澤雁於百堵應
知撫字之勞庇厦燕以千間竊爲生成之賀望
霓旌而引領念阻登龍函鯉素而齋心歡騰躍
雀聽甘棠之咏請先銘日月之常賡桑扈之章
願卽上星辰之履有懷瞻跂莫罄頌言

與丁吏部

繫丹屐之眷方拭目於銓衡咏白華之章忽摧

心于風木情深烏鳥望切鱗魴恭惟臺下大器
鏞球修名山斗家傳舊學三萬言之易已東代
有聞人十八公之夢斯叶玉璫黃流之馥郁皜
皜不染一塵米壺朱絃之直清矯矯獨凌千仞
兩邦司李系提丹筆之春二署含香徑荷紫囊
之橐均衡石而叙品執刀尺以題才離渭分涇
必嚴紫朱之察登奇拔異不令寒素之淹 帝
方妙簡以典國銓公乃讀禮而啣家恤陟屺興
感彌增北堂之懷闔門養恬益峻東山之望雖

盧望以終孺慕未忍急於公除而袞繡以俟來
歸當亟還於舊物某久塵采藻總屬培栽望柰
柰之素冠莫展興居之間瞻几几之赤舄倍深
仰止之忱惟願移孝作忠抑情順變前裴王後
盧李不負水鏡之稱左稷契右臯夔卽上星辰
之武

與趙鈐岡觀察

恭惟台臺海嶽殊英干城偉望文武萬邦之是
憲精神千里以折衝褰帷而風偃百蠻茂著澄

清之節攬轡而威行六詔弘宣保障之勲金馬
碧鷄之鄉披雲見日冉驪標榆之長回面華心
蓋將埽幕之南而空且使分陝以東而治蒼山
洱水暫布化而小屈油幢玉戚雕弧卽仗鉞而
大開戟府某五窮鼪技三徙鴉林談詩未解匡
頤筭經徒便邊腹昆彌天遠悵龍門之久睽伏
臘飈馳恨魚書之莫致惟藉粉榆之世講敢爲
枯朽之先容望華躅以難攀空懷調慙于崇巖
而有覲仰藉包荒

同鄉公賀蔡伯達太守

光膺芝檢出牧桐城蘭水壺山想極憇棠之父
老隼旗熊軾歌喧騎竹之兒童一札先傳七屬
交慶恭惟臺下比德於玉其平也繩道韻文心
皎皎出風塵之外坦衷亮節昭昭揭日月而行
宜簪筆於木天乃鳴琴于花縣洗炎瘴爲清涼
之境兩地絃歌陶蠻蛋爲禮義之鄉千秋社稷
再騰邑最旃賂郎潛五雉爲修藝事應道人之
狗七兵有秩軍司參圻父之權朝謂子尼今之

正人典銓斯重 帝曰溫陵古之雄郡與守不
輕選用賢良欲安之久矣弄印備足文武可使
也汝合專城惟甘膏隨春脚以同來使孽羽望
炎光而散去爬癢櫛垢出佛手以度衆生潤涸
噓枯試仙方而甦羣命忠獻堂之坐嘯雅稱凝
香端明殿之趨班卽看鳴玉某等昔分濡於鄰
壤思漑餘波今聯采於舊京喜陪後乘方切受
塵之願忽聞除目之頒夏屋焉依共欣父母之
孔邇春臺云陟何憂士女之仳離 朝廷擇人

不擇官應知舉龔之意國人望公如望歲更察
來暮之謠傾注情深編摩語淺

又

出綸丹宸作翰清源胸貯范老子十萬兵寰中
倚重朝有元使君數百輩天下又安宜此擁麾
恭先勸駕仰惟臺下德園廣漠道岸崇深翠竹
高梧干青霄而亭亭獨上寒潭秋水橫素練而
泠泠絕塵肘後有醫國經瞭若燭照舌底出水
人語穆如風清出宰則言絃宓琴追藁城之惠

政爲郎而文經武緯抱方叔之壯猶紉蘭自馨
芬苾豈嫌於獨賞茹蘼有味恬寧不改乎素心
卽龍戶馬人戀戀畏壘之尸祝此共工祈父巖
巖察察之具瞻睠彼溫陵首稱要郡地連山海
烽烟時發乎不虞俗尚紛奢公私交詘于彫敝
帝曰誰其共理是在二千石之良民謂以我公
歸茲爲十萬戶之福烹鮮馴雉按之縣譜施已
試之良方白菟紫茄得自家傳趾前人之芳躅
鋤豪暴而拔薤一本勸農桑而秀麥兩岐破觚

爲雕返淳風於鄒魯教讓止競平質成於芮虞
洛渡萬安橋蔡忠惠之澤今再造矣黃堂一杯
酒王忠文之句儻復賡乎竚觀渤海賣刀之勲
行應宣室前席之對某分輕蟬翼技薄鼠肝從
白社侍高吟欣然把臂向烏程醉醇酎不覺厭
心顧自雀觴之南缺焉魚書之問每思舊令尹
之政願切受塵忽聞新太守之除歡騰賀履有
幸虎符之合得借寇君於帝前竊計熊軾之
臨或爭杜公於界上僭憑寄雁寅慶拂龜錯餌

二上卷之二
三
拔綸某媿周璆任崇也已甚式廬解榻公爲陳
蕃龐參則有餘敢抒葵誠伏垂茹鑒

復趙東流

依光梓里恨阻龍門竊潤花封喜瞻鳧舄曾未
將於一介乃過枉乎雙鱗恭惟臺下器宇宏深
風猷膚敏緣儒飾吏暫紆鼎鉉之登學道愛人
小試絃歌之政錯節盤根之立解奏游刃以騁
然引商刻羽之采高聽鳴琴而莞爾最騰三異
歡洽一同風翮行翔乎九霄月題豈淹于百里

某朽資集木拙士採芹每聞芻牧之賢聲時動
粉榆之喜色緇衣真好固自篤於中心華袞刻
褒何能效其綿力過勤鼎翰兼辱篚儀飲青湖
千頃之波數腹而止分菊所一枝之秀有苾其
馨七襄之報不成章顏之甲矣片語之投永爲
好公其鑒之徒切感藏罔殫頌謝

賀鄭冢宰

代

渙號宸綸晉登文部統百官而均四海久虛
常伯之尊執三銓而定九流孰出鉅公之右世

運亨矣 朝論翕然竊以天官首六卿周稱太宰文昌居八座唐列前行惟知人自昔所難況冢司尤鍾其劇必毛孝先之拔真抑僞始無難風俗之移卽山巨源之篤素凌虛猶未免浮沉之目考簿世調門戶無聞檢裁之功庭牧馬閣置書何益止競之操自非耆舊曷稱銓衡恭惟閣下 國棟高標廟紘古調貞心匪石挫百壬以不渝介氣如山驅五丁莫能挽其間鳳覽龍潛之迹以出處關重輕總之玉壺氷鑑之清使

頑懦皆廉立文武身兼數器丰猷夙著於南都
公忠簡在 一人喉舌載司乎北斗矧仕路積
薪之久正 皇家張網之時公雖乞芟荷以爲
裳 帝每思鹽梅而調鼎十行綯詔榮賁通德
之鄉一節以趨欣識尚書之履孚告圭約納牖
詎云 主聽高於天杜私謁塞旁蹊自信臣心
清若水葢筐篚望門而卻 上知最深且樓臺
無地以居輿情素叶茅茹彙拔漸看振鷺之充
庭桂隱可招行見白駒之空谷某等舊陪鵷列

正聳巖瞻新聽 鸞音倍增屢賀隨小夫貢牘
衣冠猶想於後塵喜君子得與草木願濡於今
雨前馬裴後盧李且暫揮風月之談左稷卨右
臯夔斬更上星辰之武懷懷同戀嘒嘒奚殫

復江水部中秋

桂殿淨秋容不淺南樓之興秣陵開霽色遙分
東璧之輝惟 臺下篤念粉榆寵頒瓊玖芝函
盟捧恍接銀漢之槎玉液登嘉重醉冰壺之脫
媿投桃之莫報惟銘佩以弗諼聊附謝言曷旣

瞻戀

通陳宜蘇明府

十室絃歌已叶一同之化千家畏壘更騰三異
之聲幸依燕厦之生成遙跂龍門而踟躕敬陳
小牘冒貢大鈞恭惟臺下德宇鴻龐才鋒犀銳
妙韻絕郢中之雪高標擎天半之霞羅川嶽于
胸直已吞雲夢之八九吐琳琅之筆不翅躡上
林之二三風翮九霄宜搏鵬于鯤海月題千里
姑試馬于蟻封帝睠炎荒妙簡宅生之寄公

二上
卷二
二六
二
憐下邑曲垂卵翼之仁德意惟注于左右民功
令必孚於先後甲催科不擾鼠雀之路俱窮撫
字多方鴻雁之居永奠翩然飛雙鳧之舄暫託
枳棲行矣賜五鳳之醑卽登柏府某腹慚邊笥
何能範乎子衿籍授滕廛樂只民之父母徒以
南雍匏繫莫拔揚鱗之綸惟是北斗葵傾敢忘
袞章之頌澧有蘭沅有芷永懷調怒於瓊枝舟
作楫旱作霖竚看勲名於玉鉉寸衷欲舞尺喙

難宣

代屯馬回各道

紀綱舊甸人乏偶承屯牧 新綸 上恩洊至
慚彼其之不稱賴同事之得賢有幸側珠何當
投璧恭惟門下學深鴻秘才迅龍淵不兢不綵
暫布油幢之雅化允文允武行宣牙纛之壯猶
一路共戴福星百城如游化日計田里之阪險
原隰久已周知而駟野之騎皇驪黃尤宜咨度
我疆我理何以護百二之金湯維駒維騏何以
集三千之雲錦使馬騰士飽過百里師于枕席

此豈力能祈海晏河清壯十五郡之屏垣尚希
愛助敬附雙魚之問莫報五雲之珍

代屯馬回各府

一臺激揚之任謬玷紀綱三江屯馬之司疇咨
岳牧幸藉高賢之羽翼或逃瘴曠於簡書矧
辱好音益崇雅眷竊惟三用莫如乘馬九農亦
以寓兵籍毛齒視瘠肥供十二閑八駿之選行
曼胡居襁褓省三十鍾一石之艱非求牧與芻
孰飽樵蘇之後爨必有實其積庶寬庚癸之首

呼顧凋疲砵罇之餘每煩振刷而勞來安集之
際尤費調停欲兵食兼足以亡憂惟寮案同心
而已足願斬十年之生聚藉以報瓊曷致三千
之牝駉尚資攻玉

請黃京兆

神臯坐鎮輔畿快仰歲星 帝里追隨紳綬幸
瞻卿月維三秋之轉序屬萬寶之告成敢肅芹
筵恭迓台袞秕稗不堪辱上客敢惠微而假燕
閑蘋藻可以羞王公敬齋遯以受鴻誨儻荷責

思可勝豫喜

復陳立之司理

一官敎胄方詒邊腹之嘲十部遺書忽枉郇雲
之問故情厚甚新藻斐然遙瞻貫索之輝倍切
蒹葭之感恭惟臺下負猷鴻碩蓄德駿龐奮鵬
翮於南溟積厚風力空馬羣于上駟選重天閑
惠徼江右之德星來歌郢中之白雪棘林嘉石
計必存欽恤之心湘水洞庭逾足展澄清之志
廉貪之鑒無遺照何擇非人小大之察必以情

惟良折獄雀角鼠牙之訟洗以不冤蜂腰鶴膝
之呷飽之乃粒朱絲丹筆翹司柱后之文白簡
青蒲行赴席前之對某久玷芹序故自擣材
何意乞靈於通家猶然惠顧乎世好風塵失路
追惟傾蓋之綢繆吳楚相思更辱投璫之纒綖
亦旣覲止心則悅邈矣想法曜之高欲往從之
河無梁瞪乎悵漢江之泳藏謹珍于十襲報靡
效乎七襄感與媿并神隨書去

復啟圖關使

年節

共派金天方駕行葦之雅聯班白下更慙伐木
之求惟管蒯之不遺故璫瑤之先及捧折梅之
訊忽頒廿四橋之春聞菱棠之歌已遍十萬戶
之口宜介穰穰之福履以稱皇皇之使華某身
滯周南心懸斗北有椒有飴末由稱藍尾之一
觴如竹如松願益播青規於萬物敢後臯陶之
拜手莫罄猷斯之頌言

南中九列公賀吳曙老大拜

代

彤墀簡命東山擁上相之輶黃閣調元北斗曳

文昌之履象形惟肖 帝賚枚卜允協人情恭
惟相公閣下命世真儒承天上柱英靈鍾華蓋
之氣誕降異人經術得草廬之傳紹明正學

臨軒賜對五色祥開于日華講幄論思孤忠時
動乎 天聽越自容臺寅直益崇巖石具瞻公
雖雅志於初衣 上每繫情於歸袞蒲輪渙召
當日月之旣除揆席升賢際風雲之玄感東閣
參聯玉鉉間兩社以疏榮南宮翊贊璇樞考六
符而弘化問朝問左右庶言僉同惟 天惟

祖宗一德咸享溫公來自洛土衛士懽迎謝傳
出爲蒼生廷紳交賀某等望江關紫氣恨隔龍
門聽殿閣黃麻欣依燕厦敢續徂徠之頌載賡
慶曆之詩遇主巷孚公主勦立秦域中之
否拔茅茹招桂隱會卽春天下之秋

賀施漕使擢長楚臬

將輸奏最總憲升華四牡周道之倭遲星言雙
節六條漢法之寬大風聳百城五湖已望歌襦
九旅猶思卧轍恭惟臺下斗山碩望文武壯猶

被襟潛郎已頌恤功之川后帷褰膚使更仗主
業之蕭何金簡授玄夷敷土而陽侯順軌黃頭
飛綵鷁轉漕而風伯效靈六轡如絲久賢勞於
苞栩三軍挾纊已流爛於坻京人謂吳有歲星
正仰木牛之運帝曰汝陳時臬爭爲竹馬之
迎復口武昌山川遂壯其彈壓江沱漢廣草木
亦熟其威名遙知攬轡而慨然會有解綬而去
者周爰咨度卽開衡嶽之雲雅志澄清何媿洞
庭之水暫焉持斧行矣宅揆某猥以下材謬叨

世好忽聞新渥倍切恒欣雖迹滯周南莫擁龍
門而斂版而心懸淮上每託燕厦以彈冠敢肅
魚槭仰塵鶴列飽樵蘇之後爨且書給饋之勲
光弩矢以前驅竚趣介圭之覲

端午復黃關使

桃葉羈棲令節幾成虛度蒲觴落莫多儀忽荷
遠頒時瞻北斗之輝彌切南枝之想恭惟臺下
心澄止水政叶仁薰虞絃奏解慍之歌商楫負
濟川之望如日斯永調四氣於天中與物咸熙

開五奠於地臘洵矣祥隨履考因之樂與人同
某沐波潤於蘭湯長飫維馨之德分滴瀝於菖
酒末陪旣醉之歡蓋惟篤念行葦是以不遺菅
蒯施者未厭媿無金錯之酬矢之勿諉期效玉
環之報謹附遽使伸謝一言遙望邗關有懷百
結

報傳文學

分芳榆梓猶隔龍門託好松蘿忽來魚素徒切
投璫之感何當倚玉之榮恭惟門下簪紱承家

球琳瑞國竇龍崔鳳早推世業雲仍陸海潘江
高揭士林月旦馬卿七經之授學不啻于麗辭
揚子四賦之工玄豈終于尚白九萬里風斯下
行看鵬翮之騫三千字日未斜預卜螭頭之對
某一瓊殊冷再鼓已衰干時素拙脂韋持法逾
辣薑桂嗟余髮種種不堪羊腸笑此身飄飄何
戀鷄肋念每絕乎小草迹疑繫於瓠瓜夢繞泉
山猶缺興居之問書傳京國況辱筐篚之陳拜
寵貺之施先光生華袞媿步趨之睽後報乏錯

刀薄有一芹之將少展雙環之謝其諸啣結罔
究編摩

復傳朋台觀察

並舍女牛日結思瓊之念問津烏鵲天開種玉
之緣有幸側珠何當投璧望光塵而靡及矢明
德以弗諼恭惟臺下雅鎮若山澄澹如水金玉
君子已克世其家聲舟楫巖臣每時發乎王
夢厥臨孔惠所去見思婁試田里之循良羣聚
畏壘之尸祝羊魚時犢清修不改于花封虞柳

召棠遺愛常依乎樾蔭雖得州如斗堂雅稱于
名水而遵渚有星民歡呼于得歲及瓜受代擁
節治兵卽金馬碧鷄願通文教柰寸雲尺霧欲
點太空公固遂志于初衣人尚注望于歸繡東
山捉鼻暫爲泉石之栖商野肖形行騎尾箕而
上某粉榆未植章句豎儒于時咄咄以無奇持
法磴磴而多忤蛾眉見妬分固宜于投荒鷄骨
自憐情何堪于涉遠顧念將迎之久廢竿牘無
從乃辱惠問之先施筐筐有爛一字之褒榮於

袞拜賜屏營七襄之報不成章題封踧踖倘垂
菲葑之采蘄鑒蘋藻之羞

賀蔡伯達府公

隨京國之鵷班欣聯朝綬望泉山之熊軾喜
隸氓編願入大冶之鑪僭陳小夫之牘有懷燕
賀猶阻鳬趨恭惟臺下德履粹明文心清遠黃
流玉瓚芬芳不染一塵翠柏蒼松夭矯獨凌千
仞馴兩邑雉黃金錫異於花封合二署鷄白雪
蜚英於蘭省特簡望郎襟被出褰刺史檐帷

舊令尹之雙鳧去思猶繫新使君之五袴來暮
已歌委蛇兮羔羊素絲江漢以濯劬勞乎鴻雁
赤子海國用康晷月而惠問風馳四境之謳聲
雷動某猥以樗散濫附竽吹歲序蹉跎感舊歡
之如夢風塵躑躅聞新政以皈依未能效任子
之規拔薤一本已共賦張君之樂秀麥兩岐幽
壑潛鱗敢爲揚鱗錯餌明月烏鵲倍思越鳥南
枝恭致綈函少伸丹悃中和樂職方銘日月之
常姓字 書屏卽聽星辰之履

壽王開府代

華渚流虹方祝 嵩呼於 萬壽弧南垂昴忽
瞻星見于三台慶叶懸桑歡騰騎竹卽六幕祈
添海屋矧一陶出自鑪錘恭惟閣下生並甫申
祥鍾嶽瀆之屏之翰風猶夙著于十連不兢不
綵譽望獨高于三獨下車而求莫祁寒暑雨每
切其咨仗鉞以登壇鼉鼓犀渠咸瞻具美翼
聖祖飛龍之國地壯金湯蒞宣父辨馬之墟江
澄素練維茲帝昊之秋半正屬皇覽之揆初月

吉誕彌五百年而生名世天壽平格八千歲以
爲春秋某昔侍馬帷今依烏府溪毛澗藻豈能
效三祝於華封山阜岡陵願永介九如于天保
文爲經武爲緯劍履卽上星辰外理國內理身
鐘鼎以當鉛汞有懷忭舞莫罄颺言

候掌詹劉大宗伯

代

丹詔起家紫囊荷橐常伯正南官之位師表庶
常儲端首東禁之榮聯班翰學惟求舊人
以大用故處重地于宿儒恭惟閣下江漢鍾靈

貞元應運胸吞雲夢之八九藜火燭其校讐筆
躡上林之二三木天簡而論譔演絲綸於右掖
文超班馬之華寅夙夜於容臺武接夔龍之步
曲高寡和道大莫容公遽尋鷗鷺之盟人共惜
鳳鸞之去甘載之江湖渺矣雖片雲游物外之
心九戔之袞繡依然忽半夜動席前之問十行
申命載起洛英一節趨朝復咨伯秩春卿
典三禮喉舌居北斗之司端尹肅一宮翊翼捧
前星之重況玉署延英之地爲蓬館育材之師

羣藹藹之吉人屬循循之善誘龜疇衍綠字抽
二酉難見之書象罔得玄珠發千古不傳之秘
蓋使多士業斯征邁預備國琛且俾元良學有
就將弼成主器某備員南國無緣伏光範之
門仰止高山有懷識鄭公之履引星辰而上其
欣君子之得與依日月之光竊效小夫之貢牘
願益隆於殊眷亟鼎拜於大鈞斗中之貴曰文
昌已登八座魁下之星曰台宿卽面三槐